

CHINESE - JAPANESE LIBRARY of  
HARVARD - YENCHING INSTITUTE  
AT HARVARD UNIVERSITY  
OCT 31 1940

4

T 3150 / 0332.83

應州續志卷之六

哈佛大學漢和  
圖書館珍藏印

應州知州南豐吳炳纂輯

帝系志

皇帝

皇后 主 皇子

諸王

攷王溥撰唐及五代會要立帝系一門敘各帝歷年久  
近傳授始末次及后妃皇子公主皇族之名氏封爵後  
之編會要者因之文獻通考亦倣其例立帝系云應之  
後唐李氏祖宗非有積累功德可紀而乘時遘運帝有  
天下十餘年雖享國不永而皇子諸王見五代史者鑿  
鑿可據未便使志乘獨闕宋后郭氏系出金城後雖退

居瑤華而母儀天下已久旋經追復位號較之石晉李  
后不更生榮歿哀也歟次帝系

皇帝

後唐

明宗皇帝

五代史職方考帝應州人本紀父電爲鴈

門部將生子邈佶烈以騎射事太祖爲人質厚寡言

執事恭謹太祖養以爲子賜名嗣源莊宗時以功拜

代州刺史旋拜相州刺史昭德軍節度使久之徙鎮

安國同光元年徙鎮橫海拜天平軍節度使蕃漢馬

步軍副都總管莊宗入汴拜中書令二年徙鎮宣武

兼蕃漢內外馬步軍總管三年徙鎮成德同光四年

趙在禮反於魏莊宗遣嗣源討之三月壬子至魏甲寅軍變嗣源入於魏與在禮合丁巳以其兵南入汴州四月丁亥莊宗崩己丑入洛陽甲午監國朝羣臣於興慶宮丙午始奠於西宮皇帝卽位於柩前甲寅大赦改元天成二年正月更名亶五年改元長興四年十一月崩於雍和殿年六十七帝卽位時春秋已高不邇聲色不樂遊畋在位十年於五代之君最爲長世兵革粗息年屢豐登生民實賴以休息云

愍皇帝

本紀名從厚明宗第五子爲人形質豐厚寡

言好禮明宗以其貌類已特愛之天成二年以檢校司徒拜河南尹判六軍諸衛事加檢校太保同中書門下平章事三年出爲宣武軍節度使四年徙鎮河東長興元年封宋王徙鎮成德四年十一月秦王從榮得罪死明宗病甚遣宦者孟漢瓊召王於鄴而明宗崩祕其喪六日十二月癸卯朔發喪於西宮皇帝卽位於柩前羣臣見於東階復於喪次丙午成服於西宮明年改元應順潞王從珂反兵潰出居於衛州爲從珂所弑晉高祖卽位諡爲愍皇帝

炳按文獻通考莊宗以後唐為唐之嗣明宗又以金城之支為莊宗之嗣雖四代祖考曾經追尊立廟應州而究其所云七廟者以後唐之獻祖國太祖克莊宗存而上繼唐之高祖太宗懿宗昭宗是捨其祖而祖人之祖矣且以朱邪三世與唐室連敘昭穆尤為非禮云攷五代史本紀明宗高祖名聿曾祖名敖祖名琰考名電今連類書之亦足為應地之光矣

皇后 公主附

五代晉

高祖皇后李氏唐明宗女初號永寧公主清泰二年封魏國長公主自廢帝立常疑高祖必反三年公主自太原入朝于春節辭歸留之不得廢帝醉語公主曰爾歸何速欲與石郎反耶既醒左右告之廢帝大悔公主歸以語高祖由是益不自安高祖即位公主當為皇后天福二年三月有司言皇太妃尊號已正請上寶冊太妃高祖庶母劉氏也高祖以宗廟未立謙

抑未遑七年夏五月高祖已病乃詔尊太妃爲皇太后然卒不奉冊而高祖崩故后訖高祖世亦無冊命出帝天福八年七月冊尊皇后爲皇太后太后爲人彊敏高祖常嚴憚之出帝馮皇后用事太后數訓戒之出帝不從乃及於敗後從出帝北徙崩於建州五代

史

宋

仁宗皇后郭氏其先應州金城縣人平盧節度使崇之孫也天聖二年立爲皇后初帝寵張美人欲以爲后章獻太后難之后旣立而頗見疎其後尙氏與楊美人俱幸數與后忿爭一日尙氏於上前有侵后語后不勝忿批其頰上自起救之悞批上頸上大怒入內都知閻文應因與上謀廢后且勸帝以爪痕示執政宰相呂夷簡怨后乃曰古亦有之后遂廢詔封爲淨妃玉京沖妙仙師賜名清悟居長樂宮中丞孔道輔諫官范仲淹等伏閣言后無過不可廢道輔等俱被黜責景祐元年出居瑤華宮而尙美人亦廢於洞真宮入道楊美人別居景華宮又賜后號金庭教主沖靜

元師後帝頗念之後存問賜以樂府后和答之辭甚愴惋帝嘗召入后曰若再見召者須百官立班受冊方可小疾遣文應挾醫診視數日乃言后暴薨中外疑文應進毒而不得其實上深悼之追復皇后而停謚冊祔廟之禮

宋史后妃傳

炳按文獻通考郭后正位宮闈九年其廢也坐與後宮爭寵非如前代霍賈之徒有不可恕之大罪是以當時范文正公輩力爭以爲過舉失德旣而昭陵悔悼追復位號禮官因請祔廟而知制誥劉敞以人

無二嫡尼之事遂不行夫古人所謂並后二嫡者但不當使妾上僭耳如后旣廢而復則固后也又已歿則不嫌其爲先后也何二嫡之有五代史載明宗女興平公主永安公主前後俱適趙延壽又有晉國公主未知適何人通考載壽安公主永樂公主俱明宗女附錄於後

皇子

後唐

李從璟 明宗子初名從審爲人驍勇善戰而謙退謹  
敕從莊宗戰數有功爲金槍指揮使明宗軍變於魏  
莊宗謂從璟曰爾父於國有大功忠孝之心朕自明  
信今爲亂軍所逼爾宜自往宣朕意毋使自疑從璟  
馳至衛州爲元行欽所執將殺之從璟呼曰我父爲  
亂軍所逼公等不亮其心我亦不能至魏願歸衛天  
子行欽釋之莊宗憐其言賜名繼璟以爲己子從莊



宗如汴州將士多亡於道獨從璟不去左右或勸其逃禍從璟不聽莊宗聞明宗已渡黎陽復欲遣從璟通問行欽以爲不可遂殺之明宗卽位贈太保

秦王從榮明宗子天成元年以檢校司徒兼御史大夫拜天雄軍節度使同中書門下平章事三年徙鎮河東長興元年拜河南尹兼判六軍諸衛事從璟死從榮次最長又握兵柄是歲秋封秦王故事諸王受封不朝廟而有司欲重其禮乃建議曰古者因禘嘗而發爵祿所以示不敢專今受大封而不告廟非敬順

之道也於是從榮朝服乘路車具鹵簿至朝堂受冊出載冊以車朝於太廟京師之人皆以爲榮三年加兼中書令有司又言故事親王班宰相下今秦王位高而班下不稱於是與宰相分班而居右四年加尙書令食邑萬戶又加天下兵馬大元帥有司言元帥或統諸道或專一面自前世無天下大元帥之名其禮無所考按請自節度使以下凡領兵職者皆具橐鞬以軍禮庭參其兼同中書門下平章事者初見亦如之其後許如客禮凡元帥府文符行天下皆用帖

又升班在宰相上從榮大宴元帥府諸將皆有頒給  
控鶴捧聖嚴衛指揮使人馬一匹絹十匹其諸軍指  
揮使人絹十匹都頭已下七匹至三匹又請嚴衛捧  
聖千人爲牙兵十一月以罪被害於河南府

許王從益明宗子未知所生母幼養於王淑妃長興四  
年封許王廢帝時晉高祖兵入京師妃與王匿於鞠  
院以免天福四年九月詔以郇國三千戶封唐許王  
從益爲郇國公以奉唐祀服色旌旗一依舊制太常  
議立莊宗明宗愍帝三室以至德宮爲廟詔立高祖

太宗爲五廟使從益歲時主祀出帝時契丹入京師  
拜從益爲彰信軍節度使德光北歸留蕭翰守汴州  
漢高祖起太原翰欲北去乃逼從益權知南朝軍國  
事漢高祖擁兵而南遣郭從義先入京師殺之時年

十七 俱見五代史

炳按歐陽子云無父曷生無君曷以爲生而世之言  
曰爲忠孝者不兩全夫豈然哉君父人倫之大本忠  
孝臣子之大節豈其不相爲用而又相害者乎抑私  
與義而已耳蓋以其私則兩害以其義則兩得從璟

之於莊宗知所從而得其死矣哀哉

諸王

後唐

李從璨明宗姪初爲右衛大將軍安重誨用事自諸王將相皆下之從璨爲人剛猛不能少屈而性倜儻輕財好士重誨忌之明宗幸汴州以從璨爲大內皇城使會以事爲重誨奏貶房州司戶叅軍死重誨誅詔復其官贈太保

洋王從璋字子良明宗姪少善騎射莊宗時將兵戍常山聞明宗兵變於魏亦起兵據邢州明宗卽位爲捧

聖左廂都指揮使改皇城使領饒州刺史拜彰國軍節度使徙鎮義成明宗幸汴州以事坐罷爲右驍衛上將軍居久之出鎮保義徙河中長興四年夏封洋王晉初徙鎮威勝降封隴西郡公從瑋鎮保義始折節自修在南陽頗有遺愛天福二年卒年五十一子重俊爲虢州刺史坐贖後爲商州刺史以罪死

兗王從溫字德基明宗姪初爲北京副留守歷安國忠武義武成德武寧五節度使長興四年封兗王晉高祖立復爲忠武軍節度使開運二年徙河陽三城卒

於官

涇王從敏字叔達明宗姪爲人沉厚寡言善騎射初從莊宗爲馬步軍都指揮使兼行軍司馬明宗入立遷皇城使保義軍節度使與討王都歷鎮橫海義武成德歸德保義昭義河陽長興四年封涇王漢高祖時爲西京留守封秦國公周廣順元年卒贈中書令諡

曰恭惠

以上俱見五代史

炳按五代史明宗兄弟皆不見於世家而有姪四人卽志中所載者是也歐陽永叔去五代甚近沙陀世

次俱不能詳其為唐家人傳謂太祖四弟皆不知父  
 母名號今明宗諸子父母亦不得列其名氏附於志  
 中可惜也攷從璋卒於晉天福二年從溫卒於晉開  
 運二年從敏卒於周廣順元年是皆以皇族而事異  
 姓者然五代時眷顧深重保位全身者指不勝屈豈  
 特從璋諸人為然哉

應州續志卷之六終

應州續志卷之七

應州知州南豐吳炳纂輯

貢選

封蔭

仕宦

選舉志

甲科  
武職

古之舉士即為選職之用初非有二途也至唐則以試  
 士屬之禮部試官屬之吏部於是判而為二有舉於禮  
 部而不得官者有不舉於禮部而得官者通考作選舉  
 遂立舉士舉官兩門今制科目為操觚發軔之始薦辟  
 亦人材進身之階然而後之簡拔惟賢與能非有區區  
 資格之異也應之選舉寥寥矣雍正四年後臚列如左

應州續志 卷七  
至遼金時進士鄉舉舊志俱脫漏搜金石刻亟錄之豈  
姓名積久而難閱抑英靈有待而始傳耶次選舉

甲科

進士

遼

李正臣

見所撰杜氏墳幢記

金

董 幾

章宗紀明昌四年六月賜有司所舉德行才

能之士應州董幾等並同進士出身

康晉侯

明昌五年正月河北西路轉運使李楊言應

州康晉侯等屢赴廷試有才德詔賜同進士出身○

三人舊志俱失載

王震 泰和五年閩詠榜賜及第

王同門 泰和六年恩賜及第任本州教授

王嗣福

王嗣暉

安從吉

曹琪

王倉

宋決

何汝嘉

成文舉

孟德基 以上十一人俱見明昌四年重修廟學碑記

王震王同門已補刻及第年分而王嗣福以下九人

未書今無從查核彙書於後舊志失載

朝

按雍正四年以前舊志已載不重錄

張鶴齡 乾隆十六年辛未吳鴻榜進士先以明通任

興縣教諭中式後選授山東臨淄縣知縣告病離任

馬陔 乾隆十七年壬申秦大士榜進士未仕卒

鄉舉

金

慕容肅

王嗣福

宋 沖 任本州學正

劉仲正 俱見大定十八年碑記

宋 澤 見所撰應州錄事司劉筠墓誌銘

劉愈勵 卽筠三子誌銘係愈勵書六人舊志俱失載

明

武舉 附

甯 杲 見崇正十三年淨土寺碑

鄭依雒 見墓碑

國朝 雍正四年以前舊志已載不重錄

馬克述 雍正二年甲辰科中式以明通任屯留縣教

諭再任太谷縣教諭舊志止列舉人爾時尚未登仕

版也

馬 陔 克述子乾隆九年甲子科中式後成進士

張鶴齡 乾隆九年甲子科中式後成進士



武舉

附

高冲電

趙有旺 二人俱見順治七年重修關帝廟碑記

炳按應在前明科第之盛甲於雲中如田氏霍氏父子兄弟蟬聯鵲起志不絕書今百餘年閒貢禮部捷南宮者僅四人豈古今人遠不相及耶夫龍首桑乾盤礴鬱積鍾靈毓秀寧有時代升降之殊而掇科拔萃晨星寥落何歟蓋士不以通經學古爲務幸獲一衿翹然意滿席視荒蕪人文萎茶不振山川豈職其咎耶嗚呼科目盛衰之故都人士可以惕然思憬然悟矣

貢選 按雍正四年以前舊志已載不重錄

拔貢

鄭 鼎 康熙年選拔考授教習候銓知縣。蕭志列

歲貢悞

王爾邃 雍正元年癸卯選拔任太原縣教諭

孫文運 雍正七年己酉選拔

蘇 鉀 雍正十三年乙卯選拔

馬 陔 乾隆六年辛酉選拔後成進士

張一德 大同府學乾隆六年辛酉選拔

恩貢

王錫極

乾隆元年

薄宜時

乾隆十六年

陸錦章

大同府學乾隆十六年

劉乃毅

乾隆十七年

高謙

乾隆二十六年

歲貢

鄭宗姬

康熙年貢先任榆社縣學訓導再任平遙縣

學訓導

劉昌宗

康熙年貢任夏縣學訓導

孫大位

康熙年貢任靈石縣學訓導。三人蕭志止

列貢生尙未仕補書之其年分無考

劉成偉

雍正四年任永寧州學訓導

王向極

雍正五年任石樓縣學訓導

高淑孔

雍正七年任忻州學訓導

李友白

雍正八年

劉光弼

雍正十年

孫遜

雍正十一年

李繼白 雍正十三年任崞縣學訓導

高一玟 乾隆元年

張全璧 乾隆二年任夏縣學訓導

帖一琚 乾隆四年

王 製 大同府學乾隆四年任孝義縣學訓導

豐希聖 乾隆五年

馬克繼 乾隆七年任平遙縣學訓導

張新邦 乾隆八年

帖學唐 乾隆十年

劉 仰 乾隆十一年

郭建都 大同府學乾隆十一年

霍德馨 乾隆十三年

王長順 乾隆十四年

白存直 大同府學乾隆十五年

孫大傑 乾隆十六年

唐嗣遠 乾隆十七年

次宜吉 乾隆十九年

王 瓚 乾隆二十年

張一濯 乾隆二十二年

劉維城 乾隆二十三年

高宗孔 乾隆二十五年

唐嘉標 乾隆二十六年

劉湛 乾隆二十八年

孫一淳 乾隆二十九年

孫漪 乾隆三十一年

高郁 乾隆三十三年

張于讓 乾隆三十四年。按張灝大同籍州人以歲

貢任汾西縣學訓導舊志失載補書於此

劉逢源 附貢

炳按舊志叙次貢選以恩拔列歲貢之內並不挨次  
年分似屬混淆今按年分載可以觸目瞭然矣勝朝  
重資格明經赴銓選人輒投之僻左荒遠之地即政  
績卓越鮮推轂至大僚者

國家三途並用不以科目軒輊拔萃起家膺方面節鉞者

指不勝屈即歲貢就職亦惟衰老嚴加甄別果能熟  
諳吏治多畀以民社重任俾得共展其材嗚呼盛矣

應之貢選雖少抱負超羣足副任使之人而覩茲拔  
茅彙征野無棄材有志者亦可蹶然興矣

封蔭 按舊志已載者不重錄

國朝

鮑士名 以孫承先誥贈光祿大夫

鮑崇德 官驃騎將軍以子承先誥贈光祿大夫。按

二人生於前明以封贈故列之 本朝

鮑韜 官河南魯山縣知縣以子復盛誥贈通議大

夫

鮑文 以子復泰誥贈中憲大夫

鮑孜 官湖廣夷陵州知州以子復相贈中憲大夫

馬 瓚 雍正十三年以子克述貤贈屯留縣教諭

鄭 燾 雍正十三年以子宗姬貤贈平遙縣訓導

張 鈇 乾隆二十六年以孫鶴齡貤贈山東臨淄縣

知縣

張 灝 乾隆二十六年以子鶴齡貤贈山東臨淄縣

知縣

王 知 乾隆二十六年以子爾遠貤贈太原縣教諭

王永泰 乾隆二十六年以子製貤贈孝義縣訓導

鮑 鐸 官山東蒙陰縣知縣以祖敬蔭襲職三等阿

恩哈尼哈番

鮑 鐘 官陝西西安駐防協領以祖敬蔭襲職二等

阿達哈哈番

鮑之澍 以曾祖敬蔭襲職二等阿達哈哈番

霍國柱 霍昇長孫以祖蔭從一品蔭生未仕病故

霍 琳 霍昇再次子以國柱故補蔭從一品蔭生未

仕病故

炳按鮑氏以從龍之勲疊蒙殊恩帶礪之盟上施祖

父樾蔭所及下錫子孫雖後嗣俱入旗籍而水木源

本由於金城故据家乘所載而並錄之其有因蔭而  
官居顯要者別入仕宦武職二條霍氏官至提鎮其  
祖先亦必因似續之貴叨綸綍之光而後裔徙居郡  
城世次無稽姑從其畧然則家譜所繫藉以傳世傳  
人顧不重哉

### 仕宦

金

王公謹 世宗大定時崇義軍節度副使見淨土寺石

幢 按公謹無行誼可  
考故不載人物

明

王 鎔 景泰二年以懷材抱德薦舉擢魯府左長史

進階朝請大夫 見田志

國朝

鮑 鞞 承先長子貢生河南魯山縣知縣卒於官祀



名宦子復祖官刑部員外郎復盛由蔭生授禮部主  
事陞兵部職方司員外郎遷刑部江南司郎中因公  
降戶部主事後陞補工部郎中改河南道御史歷通  
政使司左右叅議復昌亦以蔭生任湖廣漢陽府通  
判陞安陸府同知歷直隸大名府知府山東鹽運使  
被叅解任起補江南江安十府督糧道經制府張鵬  
翮保奏賢員與名

欽賜御書治民如家匾額并法帖耕織圖

鮑 攷 承先第六子由蔭生授湖廣夷陵州知州卒

於官祀名宦子復相監生廣西思恩縣知縣陞陝西  
寧羌州知州大計卓異遷兩廣鹽運使司運同復振  
貢生由銀庫筆帖式考授內閣中書

鮑 畋 承先第七子由蔭生官工部員外郎陞河南  
道監察御史外補江西督糧道卒於官子復昭監生  
任江西廣昌縣縣丞

鮑復泰 文長子以蔭授湖廣武昌府同知陞浙江台  
州府知府子鎡監生任福建浦城縣知縣

鮑復顯 敬長子廣東始興縣知縣長子鐸次子鐘孫

之澍俱見封蔭

嚴廷棟 貢生加捐通判發往直隸河工效力丁父憂  
回籍起復赴工候補授直隸天津府通判丁母憂回  
籍病故

炳按科目之設所以羅俊乂備任使自明迄今名卿  
碩士多出其中然自古取士兩漢有賢良方正唐宋  
有孝弟力田不僅科目之選故得人爲盛甲第而外  
卽職貢例監出爲國家宣猷效力豈不足以自見求  
之傳記徃徃有名不列賢書而樹功建節烜耀旂常  
者豈非上之所求下之所應別自有在而不在區區  
始進閒歟應自鮑氏父子兄弟外寂寥無聞蕭志於  
鮑氏竟未搜載豈以占名旗籍他途顯貴靳而勿書  
耶予掇其宦轍所歷約畧存之其政事或非實蹟不  
錄可也

武職

按舊志已載者不重錄

明

鮑孟輝

祖籍江南徽州人自嘉興遷應州以軍功世

襲安東中屯衛指揮入籍應州卽承先之高祖

鮑崇德

承先之父由指揮歷官驃騎將軍明史隆慶

四年冬俺答孫把漢那吉率妻子來降總督王崇古

念因此制俺答則叛人趙全等可除也留之大同慰

藉甚至疏聞於朝詔授把漢指揮使賜緋衣一襲俺

答方掠西番聞變分道入犯索把漢甚急巡撫方逢

時遣譯者百戶鮑崇德出雲石堡入其營俺答盛氣待之曰自吾用兵而鎮將多死崇德曰鎮將孰與而孫今朝廷待而孫甚厚稱兵是速其死也俺答疑把漢已死及聞言心動使使訶之崇古今把漢緋袍金帶見使者俺答喜過望崇德因說之曰趙全等且至把漢夕返俺答大喜屏人語曰我不爲亂亂由全等今吾孫降漢是天遣之合也天子幸封我爲王永長北方諸部孰敢爲亂我死我孫當襲封彼受朝廷厚恩豈敢負耶遂遣使與崇德俱來并請互市崇古以聞帝悉報可俺答遂縛全等十餘人以獻崇古亦遣使送把漢歸帝以叛人旣得祭告郊廟磔全等於市把漢旣歸俺答與其妻撫之泣遣使報謝誓不犯大同詔封俺答順義王名所居城曰歸化封把漢昭勇將軍指揮使如故。按孟輝子經綸宏治甲子舉人官靈壽縣知縣蕭志已載選舉而二人獨不登武胄中未解其故

高運貞

吳漢銀

二人俱州人官許堡守備見淨土寺鐵爐

國朝

鮑敬 字簡公承先第四子襲父世職順治乙酉隨

征陝西商州延安諸處進剿四川戊子姜逆變亂隨

征大同克捷回京授本旗叅領癸巳陞都督同知河

南河北總兵官壬寅奉命統領秦豫官兵會剿湖廣

郝寇有功旋以楚師敗績挂議起補叅領康熙甲寅

滇逆之變揀授夸蘭大統領本旗官兵出征襄陽本

年仍以都督同知充河南通省援剿總兵官乙卯裁

缺赴京候補丙辰授山西大同總兵戊辰陞右都督

